


**Los ntawm Thawj Tswj
Hwm Henry B. Eyring**

Tus Pab Cuam thib Ib hauv
Thawj Pawg Thawj Tswj Hwm



Kev Cia Siab rau Tsev Neeg txoj Kev Hlub Mus Ib Txhis

Los ntawm tag nrho cov txiaj ntsim uas peb Leej Txiv Saum Ntuj Ceeb Tsheej tau pub rau Nws cov me nyuam, lub txiaj ntsim zoo tshaj plaws yog txoj sia nyob mus ib txhis (saib Q&K 14:7). Lub txiaj ntsim ntawd yog qhov uas peb tsev neeg yuav nrog Vajtswv Leej Txiv thiab Nws Leej Tub nyob ua ke tas mus li. Tsuas yog nyob hauv Vajtswv lub nceeg vaj siab tshaj plaws, lub xilethi-aus, peb tsev neeg uas sib hlub thiaj yuav nyob ua ke mus ntxiv.

Peb txhua tus cia siab tias yuav muaj kev xyiv fab nyob nrog peb tsev neeg uas sib hlub. Rau peb ib txhia, yog ib qho uas peb tsis tau paub—ib qho uas peb paub tias peb muaj tau tiam sis tseem tsis tau muaj. Tej zaum peb twb pom qhov no nyob hauv lwm tus lub neej. Rau peb ib txhia, peb yeej muaj thiab saib tsev neeg txoj kev sib hlub rau nqi thaum kev tuag ua rau peb nyob nruq ib tug me nyuam, ib tug niam tsev, txiv tsev, kwv tij, muam, los yog ib tug pog yawg los sis niam tais yawm txiv uas peb hlub heev.

Peb txhua tus yeej muaj kev cia siab hais tias muaj ib hnuv peb yuav rov qab hnov tau kev sov siab so los ntawm tus uas peb hlub heev hauv peb tsev neeg thiab tam sim no peb xav xav puag nws dua.

Peb Leej Txiv Saum Ntuj Ceeb Tsheej uas hlub peb paub peb lub siab. Nws lub hom phiaj yog kom peb muaj kev zoo siab (saib 2 Nifais 2:25). Nws thiaj li xa Nws Leej

Tub los kom yuav muaj kev xyiv fab los ntawm tsev neeg uas nyob tau ua ke tas mus li. Vim tus Cawm Seej tu cov hlua ntawm kev tuag, peb yuav sawv rov los. Vim Nws theej peb lub txhoj, dhau los ntawm peb txoj kev ntseeg thiab kev hloov siab lees txim, peb muaj peev xwm rais los ua neeg tsim nyog txais lub nceeg vaj xilethi-aus, qhov chaw uas tsev neeg nyob ua ke sib hlub mus ib txhis.

Tus Cawm Seej xa tus Yaj Saub Eliyas rau Yauxej Xamiv kom muab cov yuam sij pov thawj hwj txum tim rov qab los (saib Q&K 110). Nrog rau cov yuam sij ntawd muaj lub hwj chim ua kev cai sib khi, qhov uas yog Vajtswv lub txiaj ntsim zoo tshaj plaws rau Nws cov me nyuam—txoj sia nyob mus ib txhis nrog tsev neeg uas sib khi ua ke tas mus li.

Yog ib qho uas Vajtswv txhua tus me nyuam uas los nyob rau hauv lub ntiaj teb no txais tau. Ib feem peb ntawm Nws cov me nyuam ntsuj plig xyeej Nws lub txiaj ntsim nyob hauv lub ntuj ntsuj plig. Vim lawv tsis muaj kev ntseeg txaus thiab lawv ntxeev siab hlo, lawv xaiv kom tsis txais kev xyiv fab uas los ntawm Leej Txiv Saum Ntuj Ceeb Tsheej lub txiaj ntsim kom muaj tsev neeg nyob mus ib txhis.

Hais txog peb cov uas ua raws li kev sim siab ntawd nyob hauv lub ntuj ntsuj plig ua ntej lub neej no peb thiaj tsim nyog txais tau lub txiaj ntsim cev nqaij daim tawv, peb tseem xaiv tau muaj txoj sia nyob mus ib txhis. Yog peb

txais koob hmoov nrhiav tau txoj moo zoo uas tau muab txum tim rov qab los, peb muaj cai xaiv ua raws li tej kev khi lus nrog Vajtswv uas ua rau peb tsim nyog txais tau txoj sia nyob mus ib txhis. Thaum peb muaj siab ntseeg nyiaj mus tom ntej, tus Vaj Ntsuj Plig Dawb Huv yuav pom zoo rau peb txoj kev cia siab thiab kev tso siab hais tias peb taug txoj kev mus rau txoj sia nyob mus ib txhis, kom nyob ua ke nrog peb tsev neeg tas mus li nyob hauv lub nceeg vaj xilethi-aus.

Ib txhia yuav xav tias, kev xyiv fab nyob mus ib txhis yog kev cia siab me me los yog kev cia siab uas tab tom ploj mus. Tej zaum cov niam tsev txiv tsev, cov me nyuam, cov kwv tij nus muag tau xaiv tej yam uas ua rau lawv tsis tsim nyog txais tau txoj sia nyob mus ib txhis. Tej zaum nej xav paub seb nej puas tau rais los ua neeg tsim nyog dhau los ntawm Yexus Khetos txoj Kev Theej Txhoj.

Muaj ib zaug Vajtswv ib tug yaj saub hais lus qhuab qhia rau kuv uas ua rau kuv nyob kaj siab lug. Kuv txhawj hais tias tej yam uas lwm tus xaiv ua yuav ua rau peb tsev neeg nyob tsis tau ua ke tas mus li. Nws hais tias, “Koj txhawj txog qhov teeb meem tsis yog. Koj yuav tsum ua neej tsim nyog txais lub nceeg vaj xilethi-aus, koj thiaj yuav muaj ib tsev neeg uas zoo tshaj qhov koj xav.”

Hais rau tag nrho cov uas lawv txoj kev sib yuav los sis cov me nyuam—los yog qhov uas lawv tsis muaj—ua rau lawv tsis cia siab, kuv ua tim khawv hais tias: Leej Txiv Saum Ntuj Ceeb Tsheej paub thiab hlub nej vim nej yog Nws cov me nyuam ntsuj plig. Thaum nej nrog Nws thiab Nws Leej Tub nyob ua ntej lub neej no, Nkawd tau muab kev cia siab tias yuav muaj txoj sia nyob mus ib txhis tso rau hauv nej lub siab. Nrog rau lub hwj chim ntawm Yexus Khetos txoj Kev Theej Txhoj thiab tus Vaj Ntsuj Plig Dawb Huv txoj kev coj, tam sim no thiab nyob hauv lub neej tom ntej nej yuav muaj kev hlub hauv nej tsev neeg uas Leej Txiv thiab Nws Leej Tub xav kom nej txais tau.

Kuv ua tim khawv tias thaum nej ua neej tsim nyog txais lub nceeg vaj xilethi-aus, ces yuav muaj raws li qhov uas tus yaj saub cog lus tias “[nej] thiaj yuav muaj ib tsev neeg uas zoo tshaj qhov [nej] xav.”

QHIA LOS NTAWM TSAB XOV NO

Cia li xav seb puas xav hais rau cov uas koj qhia txog ib lub sij hawm thaum koj zoo siab vim muaj kev cia

siab yuav muaj ib tsev neeg uas nyob mus ib txhis. Caw lawv xav txog tej lub sij hawm thaum lawv ris Vajtswv txiaj vim muaj ib tsev neeg uas nyob mus ib txhis. Nug seb lawv puas xav qhia koj. Ces koj caw tau lawv xav txog tej yam lawv ua tau zoo dua thiab ua neej tsim nyog txais lub nceeg vaj xilethi-aus lawv thiaj yuav muaj raws li cov yaj saub cog lus tias “yuav muaj ib tsev neeg uas zoo tshaj qhov koj xav.”

COV HLUAS

Qhia txog Kev Zoo Siab Mus Ib Txhis

Ib qho zoo tshaj plaws hauv txoj moo zoo yog qhov uas peb paub txog txoj kev cawm seej. Peb muaj cib fim zoo nrog peb tsev neeg nyob ua ke mus ib txhis. Qhov uas peb paub li ntawd ua rau peb muaj kev cia siab thaum peb xav tias lub ntiaj teb kov yeej peb. Thawj Tswj Hwm Eyring qhia tias, “Peb Leej Txiv Saum Ntuj Ceeb Tsheej uas hlub peb paub peb lub siab. Nws lub hom phiaj yog kom peb muaj kev zoo siab (saib 2 Nifais 2:25). Nws thiaj li xa Nws Leej Tub los kom yuav muaj kev xyiv fab los ntawm tsev neeg uas nyob tau ua ke tas mus li. . . . Yog ib qho uas Vajtswv txhua tus me nyuam uas los nyob rau hauv lub ntiaj teb no txais tau.”

Peb cov uas muaj txoj sia nyob tam sim no muaj cov koob hmoov no thiab cov uas twb tas sim neej lawm kuj muaj—tsuas yog peb pab lawv xwb. Peb cov poj koob yawm txwv nyob hauv lub ntuj ntsuj plig tam sim no, tos peb npaj lawv tej npe mus sawv lawv cev ua cov kab ke hauv lub tuam tsev. Tiam sis tej lub sij hawm tseem nyuaj ua hauj lwm rau lawv. Tej zaum peb muaj num ntau dhau, los yog peb nyob deb ntawm ib lub tuam tsev thiaj mus tsis tau ntau zaus.

Tiam sis zoo siab uas muaj lwm yam peb pab tau peb cov poj koob yawm txwv, xws li kev ua tsev neeg zaj keeb kwm, txheeb xyuas lub npe, zov me nyuam pab peb niam peb txiv thaum lawv mus rau lub tuam tsev. Thaum peb pab li no, peb ua hauj lwm rau tus Tswv *thiab* ua rau cov uas tau tam sim neej no muaj kev cia siab tias lawv tsev neeg yuav nyob mus ib txhis.

COV ME NYUAM

Tsev Neeg Nyob Ua Ke Mus Ib Txhis

Vim muaj Yexus Khetos txoj Kev Theej Txhoj thiab kev muab cov yuam sij pov thawj hwj txum tim rov qab los, peb nyob tau nrog peb tsev neeg tas mus li! Koj nyiam dab tsi txog koj tsev neeg? Ua raws li tej lus qhia no kom ua ib txoj xov ntawv ua koob tsheej txog koj tsev neeg.

1. Muab ib daim ntawv quav hauv nruab nrab ob zaug koj thiaj muaj ib daim ntawv ntev ntev.
2. Kos duab txog ib tug neeg uas txhais tes ncav cuag hniav ntawv.
3. Txiaiv tus neeg tawm. Tsis txhob txiaiv ntawm qhov uas tus neeg txhais tes kov ob sab ntawv.
4. Muab nthuav. Sau los yog kos duab txog ib yam dab tsi uas koj nyiam txog txhua tus hauv tsev neeg.
5. Muab ob peb xov sib txuas ua ke yog koj muaj ib tsev neeg loj heev!

© 2016 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub luam tawm ua lus Akiv: 6/16. Pub txhais ua lus Hmoob: 6/16. Kev txhais *First Presidency Message, August 2016*. Hmong. 12868 295



Kev Txhawb Nqa Tsev Neeg Ua Ke

Ua tib zoo thov Vajtsuv kawm tej yam no thiab nug seb koj yuav tsum qhia dab tsi. Qhov uas koj to taub “Tsev Neeg: Ib zaj Lus Tshaj Tawm rau lub Ntiaj Teb” yuav ua li cas kom koj txoj kev ntseeg Vajtsuv loj zuj zus thiab foom koob hmoov rau cov uas koj mus saib xyuas tom tsev? Kom tau ntaub ntauwv xov xwm ntxiv, cia li txuas rau reliefsociety.lds.org.

**Kev Ntseeg, Tsev Neeg,
Kev Pab**

“Ob niam txiv twg muaj ib txoj kev lav ris tseem ceeb kom ib tug hlub thiab saib xyuas ib tug thiab kom hlub thiab saib xyuas nkawd cov me nyuam.”¹ Thawj Tswj Hwm Russell M. Nelson, Thawj Tswj Hwm ntawm Pawg Kaum Ob tug Thwj Tim hais tias, “Tsev neeg yog qhov chaw uas Vajtsuv ua kom kev hlub thiab kev sib pab loj hlob tuaj.

Peb Leej Txiv Saum Ntuj Ceeb Tsheej xav kom cov txiv tsev thiab niam tsev ua zoo ib leeg rau ib leeg thiab saib pab lawv cov me nyuam zoo li tus Tswv tau pub lawv muaj caj ceg.”²

Nyob hauv Phau Ntawv Maumoos, Yakhauj hais tias kev hlub uas cov txiv tsev muaj rau lawv cov poj niam, kev hlub uas cov poj niam muaj rau lawv cov txiv tsev, thiab kev hlub uas lawv muaj rau lawv cov me nyuam yog ib qho uas qhia vim li cas cov Neeg Lamas ncaj ncees dua li cov Neeg Nifais (saib Yakhauj 3:7).

Ib qho zoo heev kom muaj kev hlub thiab kev sib haum xeeb nyob hauv pab tsev yog kev hais lus zoo rau pab tsev neeg. Kev hais lus zoo

yuav coj tus Vaj Ntsuj Plig Dawb Huv los. Muam Linda K. Burton, Koom Haum Niam Tsev tus tuam thawj tswj hwm, hais kom pab xav txog qhov no hais tias: “Muaj pes tsawg zaus uas pab txhob txwm ‘hais lus zoo ib leeg rau ib leeg?’”³

Vaj Lug Kub Ntxiv

Loos 12:10; Mauxiyas 4:15; Lus Qhuab Qhia thiab Kev Khi Lus 25:5

Zaj Dab Neeg uas Muaj Sia

Txwj Laug D. Todd Christofferson ntawm Pawg Kaum Ob tug Thwj Tim qhia txog ib lub sij hawm thaum nws yog ib tug me nyuam uas tshoov nws lub siab qhia nws tias ib tsev neeg uas sib hlub tseem ceeb npaum li cas. Thaum nws thiab nws cov kwv tij yog me nyuam tub xwb, lawv niam raug phais mob cancer uas ua rau nws mob heev thaum nws siv nws sab tes xis. Vim muaj cov tub xwb, nws yuav tsum liv khaub ncaws ntau, tiam sis thaum nws niam liv khaub ncaws, nws pheej nres thiab mus rau hauv chav pw quaj mus txog thaum qhov mob ntawd ntauwv zuj zus.

Thaum Txwj Laug Christofferson txiv paub li ntawd, nws ua twj ywm tsis noj su tas ib xyoos thiaj muaj nyiaj txaus yuav ib lub tshuab uas ua yooj yim lim khaub ncaws. Vim nws hlub nws tus poj niam, nws ua yam ntxwv txog kev txhawb nqa nws tsev neeg rau nws cov tub saib. Hais txog qhov zoo no, Txwj Laug Christofferson hais tias, “Kuv tsis tau paub txog kuv txiv txoj kev txi thiab kev hlub kuv niam thaum lub sij hawm ntawd, tiam sis vim kuv paub lawm, kuv hais rau kuv tus kheej hais tias, ‘Nws yeej yog ib tug txiv neej tiag tiag.’”⁴

LUS CIM

1. “Tsev Neeg: Ib zaj Lus Tshaj Tawm rau lub Ntiaj Teb,” *Liahona*, Kaum Ib Hlis Ntuj 2010, 129.
2. Russell M. Nelson, “Salvation and Exaltation,” *Liahona*, Tsib Hlis Ntuj 2008, 8.
3. Linda K. Burton, “Wb Mam Li Nce Mus Ua Ke,” *Liahona*, Tsib Hlis Ntuj 2015, 31.
4. D. Todd Christofferson, “Let Us Be Men,” *Liahona*, Kaum Ib Hlis Ntuj 2006, 46.

Xav Txog Qhov No

Qhov uas pab ib leeg hlub thiab saib xyuas ib leeg ua cas ho caw tau tus Ntsuj Plig tuaj rau hauv pab tsev?